



Ушшо эл, порымиз да гим берг!

16-шо (3404) №,
2019 ий 20 апрель,
шуматкече.

ЯМДЕ-ЛИЙ

1933 ий 1 февраль годсек лектеш.

0+

ЛУДЫНА КНИГАМ ПЫРЛЯ

23 апрель –
Книган да авторский пра-
ван тўнямбал кечыже.



ФОТОМ ЕШ АРХИВ ГЫЧ НАЛМЕ.

**Кидышкем книгагм кучен,
Пеленем ўжам.
Толза воктекем – вучем
Шергалаш книгагм, –**

марий писатель, поэтессе,
туныктышо Леон Рая (Раисия
Леонидовна Петухова) уныка-
же-влакым лач тыгай шоны-
маш дене йырже чумыра.
Кова У Торъял район Кугу
Кемсола ялыште ила. Каныш
кечылан, каникул жаплан
йоча-влак тудын деке уло
кумылын вашкат. Кугурак
уныкаже Эвелина Петухова
Йошкар-Оласе 17-ше номе-
ран школышто кумшо клас-
сыште тунемеш. Марий шўлы-
шан ўдыр шочмо йылме дене
савыкталтше книгагм лудаш
йўрата. Изинек чолга
Николай Рукосуев икымше
классыш коштеш. Тудо
Йошкар-Оласе 19-ше номе-
ран школышто шинчымашым
пога. Изи Настя кум ияш.
Шукыж годым коваже пелен.
Тудлан эн лишыл – коважын
йомакше. Раисия Леонидов-
нан уныкаже-влак чыланат
усталык шўлышан улыт.
Ялыште пырля погынымек,
йомакым модыт. Изирак
рольжо Настяланат логалеш.

Снимкыште: Леон Рая
шукерте огыл лекше
«Сокрытага» книгажым уны-
каже-влаклан лудеш.
Е.ИВАНОВА.


Лият ушан!

Кидышкем налам книгагм
Да ончаш вигак пижам.
Сўретше тыште сылне пеш,
Лудаш, лудаш чонем ўжеш!
Пеш сылнын тыште серыме.
Вўдла куржеш шинчам.
Моткочак шуко лаштыкше!
Йомак могай онай!
Книган куатше, ой, кугу,
Чылалан тудо туныкта:

Лудаш, возаш, чыла палаш
Да поро ен лияш кўшта.
Мураш, кушташ да сўретлаш,
Салат ышташ, кузе шотлаш,
Пашам ышташ, уш вяндаш,
Туткар дечын кузе углаш.
Лудат книгагм – лият ушан!
Ушда у мут-влак ден(е) поя.
Тый йот эллаш кает гынат,
От йом тый тушто нигунам!
Даша ИВАНОВА.
Волжский, Пётъял.

ПОДПИСКЕ

«Ямде
лий» газет-
лан чыла
связь отде-
ленийыште
подпискым
ышташ лиеш.



**Индекс
П4696.**

**Ак – 325
тенгеат 56 ыр.
Рекламе.**

Газет унала толын



Авторын фотожо.

Акций

Марий Элыште 25 апрель гыч 18 май марте 1450 гектарыште пушенге озымым шындаш тўналыт. Рослесхозын увертарымыж почеш, тений «Пушенгым шындыме всероссийский кече» шошо акций 18 майыште эртаралтеш. Марий Элыште илыше-влакат ты акцийышке ушнат. Йоча-влак, пушенгым шындаш кумылда уло гын, районысо лесничествыш йодмаш дене лекса.



Журналист паша неле але куштылго? Тиде йодышлан вашмутым Шернур район Мустай школын тунемшыже-влак дене пырля лончылышна. 5-ше да 7-ше класслаште тунемше-влак дене вашлийме годым улышышым: кызитсе самырык тукумлан журналист профессий онгай огыл. Кузе нуным возымо пашалан кумыдангдаш? Марла газетым лудышт манын, мом ышташ? Ёдыр-рвезе-влак дене ятыр жап мутланышна. Изирак класслаште тунемше-влак деке школ тошкалтыш дене волымо годым шонкалем: нинжлан мом каласыман? «Кö «Ямде лий» газетлан подпискым ыштен? Кö деке газет мöнгыжö толеш?» йодмемлан чылан, кидым кўш нöлталын, «Мы-ы-ый!» – кычкыралыч. Куаненат колтышым. Тугеже Шернур вельыш миен толмем арам ыш лий.

Н.СЕМЕНОВА.

Шинчымашнам тергена

Кызыт школлаште Россий кўкшытан тергымаш паша (ВПР) эрта. Тудо 4,5,6,7,11-ше класс-влакым авалтен. Тунемше-влак историй, географий, обществознаний, руш йылме, математике, биологий, англичан йылме дене шинчымашыштым тергат. Мыят чот ямдылалтынам.

Диана АЛЕКСАНДРОВА.
Морко, Эгерсола.



27 апрельыште Марий Элыште «Георгиевский тасма» акций тїналеш.



Йыван Кырла лўмеш


12 апрельыште Усталык ушем-влакын пöртыштышт «Литератур алмаштыш» IX республиканский сылнымут конкурс иктешлалтын. Тений тудо марий актёр да поэт Йыван Кырлан шочмыжлан 110 ий темме лўмеш эртаралтын. Марий Элысе писатель ушем вуйлатыше С.Архипован палемдымыж почеш, руш да марий йылмыла дене 300 наре паша пурен. Сеныше-влакым ойыраш куштылго лийын огыл. Эн сай паша-влакым «Эрвий» альманахеш да «Кече-Солнышко» журналеш савыктат. Конкурсын учредительже – В.Абукаев-Эмгак лўмеш «Ший памаш» сылнымут фонд (вуйлатыше – В.В.Краснов).

Х.АЛЕКСАНДРОВА.


Снимкыште: Медведево гимназийыште 2-шо классыште тунемше Дарья МИЛЮТИНА.



20 апрельыште Российыште «Библиойд» акций эртаралтеш. Темыже – «Уло тўня – театр!» Акцийышке Марий Элысе книгагудо-влакат ушнат. С.Г.Чавайн лўмеш Национальный библиотеке таче 18 гыч 23 шагат марте тўрлö программым темла. Кажнылан – пöлек: лудшо енын билетше.



Талешке кечылан пöлеклалтше мероприятий-влак: 24 апрель – Йошкар-Оласе 1-ше номеран школ, «Ший талешке» презентаций паша фестиваль. 26 апрель – рўдола, «Талешке сорта» акций; Чарла Кремль, «Мый марла ойлем» акций; «Немыч вате» спектакль.



5 майыште Морко район Унчышто «Кугече Pairem» регион-влак кокласе Folk-фестиваль эртаралтеш. 11 шагатлан тўналыш. Пайремыште «Кугече сурт» ончер-конкурс лиеш, Кугече лўнгалтыш дене лўнгалтат, йоча-влак калык модыш дене модыт.

«Ильше классике» все-российский конкурсын регионсо туржо кажне гана пайрема гай эртаралтеш. Тудым йоча-влак шке усталыкышт дене сорастарат. Руш, йот да марий писатель-влакын сылнымутан произведенийышт гыч ужашым наизусть каласкалат. Кандашымше гана эртаралтше тагасымаш Йошкар-Олаште 9 апрельште лие. Тўрлў район гыч толшо 53 ўдыр-рвезе рушла да 15 йоча марла сылнымутым лудыч.



Живая
классика

Йонгалт, сылне мут!

Марий сылнымутан произведенийым лудшо кажне ўдыр-рвезым мокталтыман.

– Мый изинек сценыште улам, – ойла Параньга школын тунемшыже Алексей Андышев (**снимкыште**). – Усола ялысе клубын пашаенже-влак дене пырля калык ончыко лектам. Произведенийым монолог семын лудаш киноактёр Андрей Ярославцев деч тунемам. Тудын каласкалымыже пеш келша.

Алексейын лудмыжо чылам ўрыктарен куандарыш. Рвезе сенышыш лекте. Тудлан «Эр вий» СДПО вуйлатыше М.М.Маланова финн-угор лагерьыш пўтўвкым кучыктыш. Тыгак Фаина Беляева (Национальный президент школ-интернат) ден Мария Ласточкина (Килемар, Арде) ойыртемалтыч.

Рушла лудшо-влак коклаште сенышыш лектыч:

Роман Лебедев, 6-шо класс (Волжский, Памар);

Матвей Карташов, 7-ше класс (Козьмодемьянск оласе лицей);

Анна Ладина, 5-ше класс (Юрино школ).

Нине тунемше-влак «Ильше классике» конкурсын финалыштыже Марий Элын чапшым аралаш тўналыт. Тагасымаш «Артек» тўнямбал йоча рўдериште 4-24 майыште лиеш.

Л.ГРИГОРЬЕВА.

Авторын фотожо-влак.



сенышыш лекте. Тудлан «Эр вий» СДПО вуйлатыше М.М.Маланова финн-угор лагерьыш пўтўвкым кучыктыш. Тыгак Фаина Беляева (Национальный президент школ-интернат) ден Мария Ласточкина (Килемар, Арде) ойыртемалтыч.



Ялем

Шап Унчо – шочмо ялем. Тудо ик уреман веле, но мыланем эн дишыл да эн мотор. Ялыштына кевыт, клуб, йоча площадке улыт. Ял воктенысе отышто тўрлў пушенге кушкеш. Мый кугешнем шочмо-кушмо верем дене!

Ольга СТЕПАНОВА.
Морко район.

Огай

Великобританийысе Уорли олаште пеш огай тоштер уло. Тудо тўнямбалне эн изи тоштерлан шотлалтеш. Экспозиций телефон будкышто верандалтын. Музейышке ик енгына пурен кертеш. Олан илышыж дене кылдалтше экспонат-влакым кажне кум тылзе гыч вашталтат.

В.СМИРНОВ ямдылен.



Советский район Кельмаксоло школышто йоча сылнымут арня эртаралтеш. Тудын кышкарыште йоча-влак артист койышыштым терген онченыт. 2-шо классыште тунемше шым икшыве ялысе книгагудын пашаенже Л.Н.Мочалован вуйлатымыж почеш «Теремокым» модын. 5-ше класс гыч 11 ўдыр-рвезе «Ванюшка и царевна» йомакым ончыктеныт (вуйлатыше – марий да руш йылмылам туныктышо Р.А.Загайнова). Театр идалыкыште тунемше-влак ончыкыжымат спектакльым шындаш шонат.

В.ГОРОХОВА.

Артист гай кертят



Авторын фотожо.



Ме, ялысе-влак, изинек пүртүс лонгаште кушкынна. Шошым пакчашке кушкыл-влакым шындена, нунын кушмыштым эскерена, кенжежим емыж-саскам, шыжым понгым погена.

Кажне кечын кайык мурым колыштына, шкеныштымат ужна. Но шукуж годым ушышкат огына нал, нуно могай тусан улыт, лүмышт кузе, кузе мурат я шүшкат. Теве Йошкар-Олагыч Марина МАЛИНИНА (снимкыште) кажне кайыкын лүмжым пала да фотоаппаратыш войза. Ачаже пүртүс деке изинек шүманден. Умыржө мучко МВД-ште служитлен гынат, шүм-чонжо дене лесник, сонарзе да колызо лийын. Марина яра жапыште, каныш кечылаште Йошкар-Ола воктенысе Пүнчер отыш лектын коштеш.

сакалаш, түрлө кочкышым пышташ, мом кочкаш йоратымыштым эскераш да чүчкыдын вес кочкышым опташ.

– Кенжежим кормушко уке. Кузе лияш?

– Да, кенжежим кормушко уке, садлан кайык-влакым «ондалаш» оклий. Шып миен веле войзаш кодеш. Күлешан татым кучен моштыман.

– Тора гыч сниматледа



Кайыкым лүм дене пала

– Те шукуж годым кайык-влакым сниматледа. Мо дене тиде кылдалтын?

– Чодыраш лектын кошташ жапым эреак муаш тыршем. А чодыра кайык деч посна лийын огеш керт. Түрлө йүкым луктын мурмышт, чогыматымышт чонем лыпландарат. Каналташ лекме годым шинчашке логалше кайык-влакым войзем. Но чыланыштын «позироватлаш», камер ончылно койышланаш кумылышт уке.

– Шулдыран йолташна-влакым кузе сниматлаш? Ала иктаж-могай секрет уло?

– Кайык-влакым сниматлаш кугу чытыш күлеш да тыгодым чояланен моштыман. Ятырын кормушко деке чонештен толыт. Садлан фотошаблоным ышташ лиеш: икмыняр кормушкым

але лишемыда? Кайык-влакше, лүдын, чонештен огыт кай?

– Южышт шкешт деке лишке намят. Түнжө – нуно лүдыкшылык укем шижшаш улыт. Садлан, уто йүкым лукде, шып лишемман, фотоаппаратын йүкшым чарыман, кокланже вшышкымат йорташ перна.

– Мыйым öрыктарыш: те орнитолог огыдал, а кажне кайыкым лүм дене паледа. Кузе тыге?

– Ятыр кайыкым изинек паленам. Палыдымым вашлиям гын, орнитолог але ятыр ий кайык-влакым войзышо-фотографшамыч деч йодам. Пален налмеке, Интернетыште нунын нерген келгынрак лудам. Тиде мыланем моткоч онай.

Х.АЛЕКСАНДРОВА.

Фото-влакым еш архив гыч налме.



Волжский район Шарача школышто «Чодырам аралена» экологий акций эртен. Тушко шүдö утла ег ушнен. Тунемше-влак арня мучко тошто кагазым школышко нумалыныт. Активист-шамыч – Денис Смирнов ден Вадим Харитонов – кагаз орам висен, сеньшым палемденыт. Роман Давыдов ден аваже Людмила Александровна эн шуко погеныт – 175 килом! Команде дене тагасымаште



Всероссийский акцияш-ке Россий Федерациянын 76 кундемже гыч 12445 ег ушнен. 118 тонн макулатурым погымо. 1914 пушенгым аралыме.

икымше верыш 3-шо «Б» классын «Непоседы» командыже лектын. Школ мучко

Чодырам аралена

чылаже 788,100 килограмм макулатурым чумырымо.

Сеньше да участник-влак-лан дипломым, сертификатым да шергакан пöлекым кучык-теныт.

Денис Смирнов: «Чодыра – мемнан поянлыкна. Тудым аралыман. Ончыкылык тукумлан яндар юж, ару вүд ситышын лийышт манын, кызыт тургыжланыман: макулатурым поген, күлеш верыш колтыман».


Вадим Харитонов: «Макулатур пушенгым руымо деч арала. Погымо кагаз гыч у сатум ыштат».

Е.ИВАНОВА ямдылен.

Чодыра вий

Ялна воктенысе чодыраште лышташан пушенге-влак кушкыт, коклан кож-влак коедат. Пүнчө-влак вашлиялтыт. Нуно кўшкө, кавашке, кече деке шуаш тыршат. Кече деч илыш вийым налыт. Ош шовыран, шем тамган мотор куэ-влак улыт. Ковыра куэ чыла вере кушкеш. Шошо чодыра эн мотор. Ошкылат чодыра корно дене – шўмлан ласка да кумыл кўшнө. Теве ала-кушеч мардеж толын лектеш. Тудо чодыра дене мутлана, кажне пушенгым ныжыл сем почеш лўнгыкта.

Вика МИХАЙЛОВА.
Морко, Коркатово.



Конкуре!

«Зеленая Весна» суб-ботник 2014 ийыште тўналын. Ты жапыште 9 миллион утла ен пўртўсым аралыме пашашке ушнен.

Пўртўс дене айдеме семын кояш кїлеш.

20 апрель гыч 20 май марте «Зеленая Весна – 2019» экологий субботник эртаралтеш. В.И.Вернадский лўмеш фонд, Пўртўсым аралыме всероссийский обществе (ВООП) да субботникым эртарыше оргкомитет «Я – участник «Зеленой Весны – 2019» конкурсым увертарат. Паша-влакым 1 июнь марте колтен шуктыман. Чыла йодышым <http://vesna.vernadsky.ru>. адрес почеш сайтыште рашемдыза.



Кроссвордым ыштымек, могай мут лектеш, палыза.

1. Шошым ужарга, шыжым вургемжым кудашеш. 2. Эр велеш ўлыкө вола. 3. Шыжым йўр деч вара кодеш да вургемым лавырта.

4. Могай насекомый эн чот пашаче?



5. Кенезым кастене могай изи шыгавлак чонештылыт?

6. Пакчасе кочкышым вес семын кузе ойлать? Пакча...
Кристина ЗОРИНА.
Морко, Эгерсола.

«Аралыза чодырам» плакат.
Никита РЕЧКИН.
Советский, Ургаш.

Тўтыра

Чодырашке тўтыра Ялтак вошт витен пура. Кечыйолжо тўтыра вошт Лышташ дене лўнгалта. Лыгга мардеж тўтырам Мландымбаке темдалеш. Ужар шудышко шыман, Йылгыжалын, лупс возеш.

Катя МАМАЕВА.
Шернур, Шўдымарий.

Шошо кече шыратен онча, шинчам йымыктара. Кисан мурыжо йырым-йыр шергылтеш. Теве корак-шамыч шокшо вел гыч толыныт да пыжашым оптат, икте-весышт дене мутланат. Ялыште сурткайык-влакат йўкланат. Икманаш, чыла чонан эркын-эркын помыжалтеш.

Икымше классыште тунемше Люда школ гыч толын пурыш. Йолжо нўрен пытен. Омса воктеке волен шинче:
– Ковай! – кычкырале. – Кушто улат?

Коваже тиде жапыште кас кочкышым ямдылкален шогылтеш улмаш. Тыгай сўретым ужмеке, чыла кудалтен, уныкажлан кемжым кудашаш полшаш пиже.

– Нўрен пытенатыс, – ўрын онча коваже. – Кушто тынар коштынат?

Изи ўдыр, ночно йолчиемжым пыкше-пыкше кудашын,

коважлан кучыктыш. Тудыжо конгамбаке кошташ шындыш да уныкажлан меж носким луктын пуыш.

– Ме таче труд урокышто изи пуш-влакым ыштышна. Йолташ-влак дене нуным пўяш колташ мийышна, – сумкаж гыч картон гыч ыштыме изи корабликым лукто. – Теве ончо, тыланетат кондышым.

Коваже ончалат, шыргыжале. – Пўяж деке молан коштында? Кемышкетше тушто вўдым кошталынат мо вара? – шонгыен тургыжланен йодо. – Пуренгает ыле гын!

– Ковай, мый шкетын миен омыл вет, – чыным каласаш тўча уныкаже, – тушто шукын колтылынна.

– Тол, шокшо чайым мўй дене подыл, – изи кружкам ўстембаке конден шындыш. – Капет ыра, от черлане.

А.БОГДАНОВА.

Шошо модыш

Ойлымаш



Талешке кечылан урок

Күкшö категориян туныктышо, Россий Президентын грантшым кок гана налше, Россий Федераций общий образованийын почётан пашаенже, Йошкар-Оласе 21-ше номеран школышто кугыжаныш марий йылме урокым вудышö **О.Н.ВАСЕНИНА** ямдылен.



1

Мут-влакым кусарен, чын возыза.

26 апрельыште мемнан республикыште Марий талешке кечым _____.
ОТМЕЧАЮТ

Тиде кечын _____ эн чолга, лүддымö, патыр эрге-удыр-влакшым шарналта. МАРИЙСКИЙ НАРОД

Калыкын историйыштыже Чумбылат, Акпарс, Болтуш, Мамич Бердей, Акпатыр да молат _____ коденыт. ГЛУБОКИЙ СЛЕД

_____ сай кышам кодышо ег-влакымат талешке радамыш пуртена. СВОИМ ТРУДОМ

2

Пуымо мут-влакым кучылтын, Марий талешке кечылан ўжмашым возыза.

Ўжына, 18 шагатлан, залышке, школысо, тендам, актовый, пагален, кугарнян, пöлеклалтше, пайрем, ме, Талешке кечылан, 26 апрельыште, касышке, йолташ-влак, шергакан.

3

Сүретыште көмыт улыт, палыза.



4

Йодышан предложений- влакым чоңыза.

1) Чумбылат кугезе марий калыкын ик эн тале да виан лужавуйжо лийын.

2) Юл вел калык тудым йүдвел марий кугыжа манын.

3) Чумбылатын сарзыже-влаклан ик гана веле огыл тушман деч мландым аралаш логалын.

4) Чумбылатым Немда воктенысе кү курыкеш тоеныт.

5) Тушман керылт пурымо годым марий калык Чумбылатым полшаш йодын.

6) Кызытат Чумбылатым марий-влак жаплат да курыкышко коштыт.

5

Диалогым умбакыже шуйыза.

- Салам лийже, Тачана!

- Салам, Микале!

- Эрла М.Шкетан лүмеш Марий драме театрыште Талешке кечылан пöлеклалтше концерт лиеш. Тый кает?

- ...

- ...

7

Предложений- влакым мучашлыза.

Кугу Ачамланде сарышке
Марий кундем гыч _____.

Шымле ныл түжем ег _____.

Латныл түжем салтак _____.

Совет Ушем Герой лүмым _____.

Марий кокла гыч тиде
лүмым эн ончыч _____.

Марий ўдырамаш-влак обо-
роно _____ фондыш _____.

8

Текстыш умбакыже талеш- ке-влакым ешарен возыза. Иктыже нерген изирак шымлымаш пашам эртарыза.

Марий калыкын шүм-чонжым, уш-акылжым виандыше шуко патыр-влак лийыныт. Нуно, шке вийыштым да илышыштым чаманде, шочмо калыкнан пиалан илышыже верч вуйыштым пыштеныт. Нуным шарныме лүмеш республикыште 26 апрельыште Марий талешке кече эртаралтеш. Но талешке тиде сарыште кредалше гына огыл. Шке илыш корнышт, пашашт дене сай кышам кодышо, марий калыкым виандымаште, наций семын күш нолтымаште тыршыше-влакат талешке улыт. Нуным коклаште С.Чавайн, В.Колумб, В.Мухин-Сави, Й.Кырла, ...

6

Чын чоңымо предложенийым палемдыза.

А. Марий талешке кечым Акпарсым шарныме лүмеш пайремлаш тўналыныт.

Б. Марий талешке кечым Мамич Бердейым шарныме лүмеш пайремлаш тўналыныт.

В. Марий талешке кечым Болтушым шарныме лүмеш пайремлаш тўналыныт.

Г. Марий талешке кечым Чумбылатым шарныме лүмеш пайремлаш тўналыныт.



Мо тугае келшымыш

Мастар кид

Йолташетлан полшо, тудым умылаш тырше.

Чанга ит лий, йолташетлан нимомат ит чамане.

Йолташет иктаж удам ышта гын, чарен шогалте.

Йолташетлан ит сыре, пырля модса.

Иктаж-мом йолташет деч сайын ыштет гын, ит моктане.

Йолташет ой-кагашым але польшым темла гын, ит шўкал.

Огай

Слонын ўмыржө 60-70 ий шуйна, маскан – 30-45 ий марте, рывыж кокла шот дене 6-8 ий ила.



Сүретым чиялте.

27 апрель – Ветеринарын кечыже.

«Айболит» йомакын авторжо кө? Йоча-влак, теат мыланна йомакым возен колтыза.

Йыгыр мут

Авамлан огеш күл шөртньö – Тудын кидше тугак шөртньö. ***

Телефоныштем уло код – Мутланаш изишлан код. ***

Шогышым мый шып ик тат, Воктекем ыш тол иктат.

Н.Д.ИЛЬИНА, туныктышо. Волжский, Карай.

Йоратыме шўжарем

Йоратыме шўжаремын лўмжö – Регина. Тудо 3-шо классыште тунемеш. Шўжарем сүретлаш, түрлө поделкым ышташ йората. Волькым, йомак гыч герой-влакым сүретла. Мый Регинам пеш йоратем: вет изам ден акам кугу улыт, а изи шўжарем икте веле. Школыш коктын коштына, корнышто пүртүсын вашталмыжым эскераш йоратена.

Полина ПЕТУХОВА. У Торъял, Кузнеч.



Индекс: Марий Элыште, Пошкырт ден Татарстан кундемлаште - П4696. Тираж 1150 экз. Заказ 16/19501. Формат – А-4-8. Директор-тўн редактор Л.В.СЕМЕНОВА.

УЧРЕДИТЕЛЬ-ВЛАК: Марий Эл Республикысе культур, печать да калык-влакын пашаш шотышто министерстве, «Ямде лий» газет» кугужаныш унитарный казна предприятий.

Газетым Массовый коммуникаций сферыште да культур наследиым аралымаште законодательством шуктен шогымым эскерыше Федеральный службыв Приволжский федеральный округысо управленийыштыже регистрироватлыме. Номер – ПИ №ФС 18-1999, 2005 ий 10 февральыште пуымо.

0+

Печатыш пуымо жап – 14-00, фактически – 13-00

Авторын да редакцийын шонмашышт түрлө лийын кертыт. Серыш-влак мөнгеш огыт колталт. Ак – кутырен келшыме почеш.

E-mail: yamde_lii@mari-el.ru, yamde_lii@mail.ru Сайтын адресше: yamde-lii.pro, Тел. 8(8362) 45-22-82(факс)

Газетым редакцийыште погымо да верстатлыме, «Марий Эл Республикысе Правительствын типографийже» ООО-што ямде оригинал-макет гыч савыктыме. Типографийын адресше: 424000, Йошкар-Ола, Комсомольский урем, 112.

Редакцийын да издательын адресше: 424006, Йошкар-Ола, СССР Вооружённый Вийын 70-ше идалыкше урем, 20 (почтовый) Эгерүмбал Амстердам, 1 (фактический).

КОНКУРС!

«Көршөк пеледыш»



Мөнгыштына түрлө пеледыш уло, но иктыже мыланем утларак келша. Тиде **орхидей**. Тудо түрлө түсан лыве гай пеледышж дене мемнам кужу жап куандара. Элыштына орхидейым еш пиалын да уш-акылын символжылан шотлат.


Варя МУСТАЕВА.

Шернур, Мустай.

6 + = 7
 + +
 + = 2 2 + = 6
 + =
 4 + 3 =
 =

Кө эн тале математик?

+ = 7 + 2 =
 + =
 + 7 =
 + = 9




Мый Эчук улам. «Ямде лий» газетым кажне шуматкечын куанен лудам. 2019 ийын 2-шо пелыжлан подпискым ыште нам.

А те возалтында?

«Ямде лий» – сай йолташ!

Шошым коклан-коклан йүр йүреш. Зонтик деч посна нөрен кертыда. Ончалза, тыште мыняр зонтик! Радамжым шуен чиялтыза.



Кок икгай лывым кычалза.

5 + =
 + 1 3 2 + =
 = +
 + = 7
 =
 + = 8



Йолташем

Мыйын йолташем – Егор. Тудо визымше номеран портышто ила. Егор дене визымше классыште тунемына. Пырля школышко коштына, мөнгышкат коктын ошкылына. Йолташем футболла сайын модеш. Мый тудым пагалем.

Антон МАСЛЕННИКОВ.

Марий Турек, Сысоево.

Судоку

	2		4	
		3		
	1		2	
	4			
				4

Газетым ыштымаште Интернетысе сүрет-влакым кучылтмо.

